


“Dwyn ffrwyth trwy ddyfalbarhad”

Cymun Bendigaidd




Cymun Bendigaidd ar Gân

Yr Ail Sul cyn y Grawys

Secsagesima

20 Chwefror 2022 am 9.15am




Cadeirlan
Deiniol Sant
ym Mangor

Saint Deiniol's
Cathedral
in Bangor



Croeso i Gadeirlan Deiniol Sant ym Mangor.



Rydych chi'n sefyll rwan
lle safodd Deiniol bron i
fileniwm a hanner yn ôl.

Yma, yn y flwyddyn
525, bu iddo gynnnull o'i
gwmpas gymuned lawn
ffydd, gobaith a chariad,
gan godi o'i chwmpas
ffens gyll—y **bangor**
gwreiddiol—iddi'n gysgod
ac yn noddfa.

Ein gweddi yw y cewch
chwithau, hefyd, eich
cofleidio yma gan yr un
ffydd, gobaith a chariad
a gyhoeddir gennym
heddiw ac sy'n ein
cyfareddu o hyd.

Yn Cymun hwn...

Yn y Cymun hwn byddwn yn cwrdd â
Christ mewn bara a gwin, ei Gorff a'i
Waed ef gyda ni.

1 Wrth inni ymgynnull, byddwn
yn paratoi ein hunain i gwrdd â
Christ trwy gyffesu ein pechodau
— y ffyrdd yr ydym wedi galaru Duw
yn ein bywydau — ac yn derbyn
gollyngdod, sef sicrwydd o faddeuant
Duw.

2 Yna rydyn ni'n gwrando ar
ddarlleniadau o'r Beibl, gan
ganfod yno arweiniad, her,
cysur a newydd da gan Dduw: geiriau
o obaith ac addewid y Nadolig hwn.
Ymatebwn trwy gyhoeddi ein ffydd
yn y Drindod Sanctaidd a chynnig i
Dduw ein gweddi dros bawb mewn
angen.

3 Yn galon i'n haddoliad heddiw,
byddwn yn cymryd bara a gwin,
byddwn yn gofyn am fendith
gweddnewidiol Duw arnynt, yn torri'r
bara, ac — fel aelodau o Gorff toredig,
trwsiedig Crist — byddwn yn Cymuno.

4 Daw ein haddoliad i ben wrth
inni dderbyn bendith Duw, yn
gynhaliaeth inni wrth ymadael.

Waeth pa mor bell yn ôl y
gwnaethoch hynny ddiwethaf, mae
croeso i chi Gymuno yma heddiw. Os
hoffech chi Gymuno am y tro cyntaf,
neu gael eich Bedyddio, siaradwch ag
aelod o dîm yr Gadeirlan.

Ceir ffydd, gobaith a chariad yma i
bawb.

Addoli gyda ni heddiw

Mae'r llyfryn hwn yn cynnwys popeth a ddywedir ac a genir yn ystod ein haddoliad heddiw. Fe'ch gwahoddir i fynd â'r llyfryn adref gyda chi, i fyfyrion yn eich amser eich hun ar y geiriau sanctaidd sydd ynddo. Fodd bynnag, nid darllen neu arsylwi ydi addoli – ond gweithgaredd, a ninnau'n cymryd rhan, ochr yn ochr â'r rhai sy'n cynnull gyda ni ac, y tu hwnt i hynny, ochr yn ochr â llu'r nef i gyd. Dyrchefwch, felly, eich llygaid; sylwch ar liw, golau, sain, symudiad a harddwch; codwch eich llais; cyfranogwch yn yr hyn a fydd yn eich gweddnewid, o roi iddo'r cyfle.

Yn ystod ein haddoliad, rydyn ni'n dweud ac yn canu gyda'n gilydd y testun **mewn teip trwm**. Darperir cyfieithiadau o ieithoedd tramor. Mae croeso ichi wneud arwydd o'r Groes pan fydd y geiriau wedi'u marcio ag ✠. Cynigir cyfarwyddiadau eraill (rhuddellau) **mewn teip coch**; os ydych chi'n ei chael hi'n fwy cyfforddus, eisteddwch yn hytrach na sefyll neu benlinio.

O'r Ddarllenfa

Pob wythnos, anfonir ebost "O'r Ddarllenfa" at danysgrifwyr gyda hysbysiadau ynghyd â delweddau wythnosol o fywyd y Gadeirlan a'r Ardal Weinidogaeth. Mae tanysgrifwyr hefyd yn derbyn diweddariadau am ddigwyddiadau a gweithgareddau arbennig. Os nad ydych chi eisoes yn danysgrifiwr, dilynwch y cod QR isod i dudalen we "O'r Ddarllenfa", a thanysgrifiwch ar waelod y dudalen, neu ewch i cadeirlan.eglwsyngnghymru.org.uk/Darllenfa/



Plant a theuluoedd ifanc

Ceir gweithgareddau a chrefftau yn ystod y Cymun Bendigaid ar Gân bob dydd Sul yng Nghapel Mair, ar gyfer unrhyw blant hyd at 11 oed. Mae'r crefftau a'r gweithgareddau yn amrywiol, gydag o leiaf un yn ymwneud â thema'r Cymun ei hun. Caiff y gofod hwn yn cael ei staffio gan oedolion cyfrifol, a bydd plant dros 5 oed yn gallu mynd a dod. Bydd plant yn parhau i fod yn gyfrifoldeb eu rhieni neu eu gwarcheidwaid bob amser. Yn y lle cyntaf, dylai plant sy'n 4 oed ac iau fod yng nghwmni rhiant neu warcheidwad oni bai bod trefniant ymlaen llaw gyda'r rhai ar ddyletswydd wedi'i wneud.

Diogelu

Mae diogelu plant ac oedolion sydd mewn perygl yn hanfodol, ac rydym wedi ymrwymo i feithrin amgylchedd lle mae pawb yn gallu addoli a chymryd rhan ym mywyd Cadeirlan Deiniol Sant yn ddiogel. Os oes gennych unrhyw bryderon, codwch nhw ar unwaith gydag aelod o dîm y Gadeirlan.

Hygyrchedd

Mae dolen glyw ar waith – gosodwch gymhorthion clyw i'r lleoliad T.


Mae copïau print bras o'r llyfryn hwn ar gael gan y stiwardiaid.

Os oes angen waffer heb glwten arnoch (yn cydymffurfio â'r gofyniad canonaidd am 20 rhan o glwten fesul miliwn), rhowch wybod i stiward.

Mae tai bach ym mhen dwyreiniol y Gadeirlan, trwy'r drws i'r chwith o'r sgrin y Cwîr.

Os bydd angen i ni adael y Gadeirlan mewn argyfwng, arhoswch ar eich heistedd a dilynwch gyfarwyddiadau'r stiwardiaid.

Trefn y gwasanaeth



Rhagarweiniad ar yr organ

Pastorale, Walter Battison Haynes (1859-1900)

Wedi'r hysbysiadau, codwn ar ein traed ar ganiad y gloch



Cynnull

Emyn



Drwy'r goruchelder, mawl i Dduw,
a thrwy'r dyfnderau maith;
yn ei holl ffyrdd mor sicr yw,
a rhyfedd yn ei waith.

O! fawr ddoethineb Cariad Duw!
Tra'r byd mewn nos ddi-wawr, -
daeth Adda'r Ail i'r dyfnder du
i wared llwch y llawr.

**O! Gariad doeth, – i gig a gwaed
yn Adda aeth i lawr,
ymadnewyddu'n gryf drachefn
a choncro'r gelyn mawr.**

**Drwy'r goruchelder Mawl i Dduw,
a thrwy'r dyfnderau maith;
yn ei holl ffyrdd mor sicr yw,
a rhyfedd yn ei waith.**

Geiriau

John Henry Newman (1801-1890)

Efelychiad

John Thomas Job (1867-1938)

Cerddoriaeth | "Gerontius"

John Bacchus Dykes (1823-1876)

Parhawn ar ein traed tan ddiwedd y Weddi Gasgl

Cyfarchiad

✠ Yn enw'r Tad, a'r Mab, a'r Ysbryd Glân.
Amen.

Gras a thangnefedd a fo gyda chwi.

A'th gadw di yng nghariad Crist.

"A syrthiodd peth had ar dir da; tyfodd, a chnydiodd hyd
ganwaith cymaint."

Cyffes

Gan gynnull i ddathlu'r Cymun Bendigaid er gogoniant i Dduw,
ymbaratown gan gyffesu ein pechodau,

ni sy'n methu â gweld arllwysiad calon Duw
mewn cread, cymuned a chymydog;

ni sy'n methu â dilyn Crist yn ein calonnau
mewn gweddi, defosiwn a chariad allblyg.

ni, er ymhell, y dygir ein calonnau i goflaid Duw
drwy air, sagrafen a gras.

Cyd-weddiwn.

**Dad nefol,
yr ydym wedi pechu ar feddwl, gair a gweithred,
a heb wneud yr hyn a ddylem.
Mae'n wir ddrwg gennym,
ac yr ydym o ddifrif yn edifarhau.
Er mwyn dy Fab Iesu Grist a fu farw drosom,
maddeua inni'r cwbl a aeth heibio
ac arwain ni yn ei ffordd ef
i gerdded fel plant y goleuni.
Amen.**

Yr hollalluog Dduw a drugarhao wrthych,
✠ maddau ichwi a'ch rhyddhau o bechod,
a'ch cadw yn y bywyd tragwyddol.
Amen.

Kyrie eleison

Kyrie eleison. Christe eleison. Kyrie eleison.
*Arglwydd, trugarha. Crist, trugarha.
Arglwydd, trugarha.*

Cerddoriaeth
Missa brevis "Capella Regalis", Anthony Caesar (1924-2018)

Parhawn ar ein traed

Gweddi Gasgl

Gweddiwn.

O Dduw, cadw dy Eglwys â'th drugaredd gwastadol; a
channa ddichon ein gwendid hebot ti ond syrthio, cadw
ni byth trwy dy gymorth oddi wrth bob peth niweidiol, ac
arwain ni at bob peth buddiol i'n hiachawdwriaeth; trwyddo ef
sy'n Grist ein Gwaredwr.
Amen.

Eisteddwn

Salmyddiaeth



W Mawr fydd llawenydd Jacob wiw,
bydd Israel Duw'n crechwennu.

**R Mawr fydd llawenydd Jacob wiw,
bydd Israel Duw'n crechwennu.**

Dywed yr ynfyd yn ei galon, "Nid oes Duw." Gwnânt weithredoedd llygredig a ffaidd; nid oes un a wna ddaioni.

Edrychodd yr Sanctaidd Un o'r nefoedd ar ddynolryw, i weld a oes rhywun yn gwneud yn ddoeth ac yn ceisio Duw.

**R Mawr fydd llawenydd Jacob wiw,
bydd Israel Duw'n crechwennu.**

Ond y mae pawb ar gyfeiliorn, ac mor llygredig â'i gilydd; nid oes un a wna ddaioni, nac oes, dim un.

Oni ddarostyngir y gwneuthurwyr drygioni sy'n llyncu fy mhobi fel llyncu bwyd, ac sydd heb alw ar Duw?

**R Mawr fydd llawenydd Jacob wiw,
bydd Israel Duw'n crechwennu.**

Yno y byddant mewn dychryn mawr, am fod Duw yng nghanol y rhai cyfiawn. Er i chwi watwar cyngor yr anghenus, y Sanctaidd Un yw ei noddfa.

O na ddôl gwaredigaeth i Israel o Seion! Pan adfer y Sanctaidd Un lwyddiant inni, fe lawenha Jacob, fe orfoleda Israel.

**R Mawr fydd llawenydd Jacob wiw,
bydd Israel Duw'n crechwennu.**

Salm 14
Cerddoriaeth
Simon Ogdon

Darlleniad

Darlleniad o Lyfr Genesis.

Yn y dyddiau hynny: Clywdod y gŵr a'r wraig sŵn y Bythol Dduw yn rhodio yn yr ardd gyda hwy y dydd, ac ymguddiodd y dyn a'i wraig o olwg y Bythol Dduw ymysg coed yr ardd. Ond galwodd y Bythol Dduw ar y dyn, a dweud wrtho, "Ble'r wyt ti?" Atebodd yntau, "Clywais dy sŵn yn yr ardd, ac ofnais oherwydd fy mod yn noeth, ac ymguddiais." Dywedodd y Bythol Dduw, "Pwy a ddywedodd wrthyf dy fod yn noeth? A wyt ti wedi bwyta o'r pren y gorchmynnais iti beidio â bwyta ohono?" A dywedodd y dyn, "Y wraig a roddaist i fod gyda mi a roes i mi o ffrwyth y pren, a bwyteais innau." Yna dywedodd y Bythol Dduw wrth y wraig, "Pam y gwnaethost hyn?" A dywedodd y wraig, "Y sarff a'm twyllodd, a bwyteais innau." Yna dywedodd y Bythol Dduw wrth y sarff: "Am iti wneud hyn, yr wyt yn fwy melltgedig na'r holl anifeiliaid, ac na'r holl fwystfilod gwyllt; byddi'n ymlusgo ar dy dor, ac yn bwyta llwch holl ddyddiau dy fywyd. Gosodaf elyniaeth hefyd rhyngot ti a'r wraig, a rhwng dy had di a'i had hithau; byddant hwy yn ysigo dy ben di, a thithau'n ysigo'u sodlau hwythau."

Clywch air bywyd i'n byd.

Diolch a fo i Dduw.

Genesis 3:8-15

Codwn ar ein traed, gan droi i wynebu Llyfr yr Efengylau yng Nghorff yr Eglwys

Efengyl



Y Halelwia. Halelwia. Halelwia. **R** **Halelwia. Halelwia. Halelwia.** **Y** Gwaeddodd Iesu at y bobl: “Y sawl sydd â chlustiau ganddo i wrando, gwrandawed.” **R** **Halelwia. Halelwia. Halelwia.**

Gras a thangnefedd a fo gyda chwi.

A'th gadw di yng nghariad Crist.

Gwrandewch yr Efengyl Sanctaidd yn ôl ✠ Sant Luc.

Gogoniant i ti, O Grist.

Bryd hynny: Yr oedd tyrfa fawr yn ymgynnull, a phobl o bob tref yn dod Iesu. Dywedodd ef ar ddameg: "Aeth heuwr allan i hau ei had. Wrth iddo hau, syrthiodd peth had ar hyd y llwybr; sathrwyd arno, a bwytaodd adar yr awyr ef. Syrthiodd peth arall ar y graig; tyfodd, ond gwywodd am nad oedd iddo wlybaniaeth. Syrthiodd peth arall i ganol y drain; tyfodd y drain gydag ef a'i dagu. A syrthiodd peth arall ar dir da; tyfodd, a chnydiodd hyd ganwaith cymaint." Wrth ddweud hyn fe waeddodd, "Y sawl sydd â chlustiau ganddo i wrando, gwrandawed." Gofynnodd ei ddisgyblion iddo beth oedd ystyr y ddameg hon. Meddai ef, "I chwi y mae gwybod cyfrinachau teyrnas Dduw wedi ei roi, ond i bawb arall y maent ar ddamhegion, fel 'er edrych, na welant, ac er clywed, na ddeallant'. "Dyma ystyr y ddameg. Yr had yw gair Duw. Y rhai ar hyd y llwybr yw'r sawl sy'n clywed, ac yna daw'r diafol a chipio'r gair o'u calonnau, rhag iddynt gredu a chael eu hachub. Y rhai ar y graig yw'r sawl sydd, pan glywant, yn croesawu'r gair yn llawen. Ond gan y rhain nid oes gwreiddyn; dros dro y credant, ac mewn awr o brawf fe wrthgiliant. Yr hyn a syrthiodd ymhlith y drain, dyma'r sawl sy'n clywed, ond wrth iddynt fynd ar eu hynt cânt eu tagu gan ofalon a golud a phleserau bywyd, ac ni ddygant eu ffrwyth i aeddfedrwydd. Ond hwnnw yn y tir da, dyna'r sawl sy'n clywed y gair â chalon dda rinweddol, yn dal eu gafael ynddo ac yn dwyn ffrwyth trwy ddyfalbarhad."

Dyma Efengyl ein Gwaredwr.

Moliant i ti, O Grist.

Luc 8:4-15

Eisteddwn ar gychwyn y bregeth

Pregeth yn y gyfres "Yno bydd dy galon"

"Dwyn ffrwyth trwy ddyfalbarhad" | Cymun Bendigaid

Y Canon Emeritws

Ar derfyn y bregeth, codwn ar ein traed

Credo

Ar y cyd, gadewch inni gadarnhau ein ffydd.

**Yr wyf yn credu ac yn ymddiried yn Nuw Dad,
a greodd bopeth sydd.**

**Yr wyf yn credu ac yn ymddiried yn ei Fab Iesu Grist,
a brynodd ddynolryw.**

**Yr wyf yn credu ac yn ymddiried yn ei Ysbryd Glân,
sy'n rhoi bywyd i bobl Dduw.**

**Yr wyf yn credu ac yn ymddiried yn un Duw,
Dad, Mab ac Ysbryd Glân.
Amen.**

Ymbiliau

Gyda'n holl galon a'n holl feddwl gweddiwn ar Dduw.

Eisteddwn neu benliniwn

Defnyddiwn yr ymatebion

Y O Dduw, yn dy drugaredd,

R **Gwrando ein gweddi.**

Y Gorffwys tragwyddol dyro iddynt, O Dduw.

R **A llewyrched goleuni gwastadol arnynt.**

Y ✕ Gorffwysed hwy mewn tangnefedd.

R **A chyfodi mewn gogoniant.**

Y Dad trugarog,

R **Derbyn y gweddiâu hyn**

er mwyn dy Fab, ein Gwaredwr Iesu Grist.

Amen.

Codwn ar ein traed



Mewn 'stad o ddiniweidrwydd da,
tra bu'n tad Adda, llwyddodd;
bwytaodd y ffrwyth oedd Duw'n wahardd,
a'i enaid hardd a lygrodd.

Nawr cnawdol genir ni i gyd,
ar ddrwg mae'n bryd yn gwbwl;
ein rheswm colli'i iawn le wnaeth,
aeth cnawd yn gaeth a'r meddwl.

Duw'r gallu, adnewyddu'n dull,
adfera'n candryll bwerau;
ac ennyn ynom nefol dân,
i losgi'n lân ein chwantau.

'Sgrifena'th gyfraith lân, O Dduw,
ar ein tufewdol rannau;
a thynned Adda'r ail, ein câr,
ei ddelw ar ein c'lonnau.

Geiriau

Isaac Watts (1674-1748)

Cyfieithiad

Dafydd Jones (1711-1777)

Cerddoriaeth | "St Columba"

Hen alaw Wyddeleg

Offrwm

Deuwn i'r fangre hon â'r bara sy'n gynhaliaeth.

Fe ddaw inni'n fara'r bywyd.

Deuwn i'r fangre hon â'r gwin sy'n mwyneiddio.

Fe ddaw inni'n waed einioes y byd.

Gweddi Ewcharistaidd

Gras a thangnefedd a fo gyda chwi.

A'th gadw di yng nghariad Crist.

Dyrchefwch eich calonnau.

Yr ydym yn eu dyrchafu at yr Arglwydd.

Diolchwn i'r Arglwydd ein Duw.

lawn yw rhoi ein diolch a'n clod.

lawn yn wir, ein dyletswydd a'n llawenydd bob amser ac ym mhob lle, yw diolch i ti, Dad Sanctaidd, hollalluog a bythfywiol Dduw, trwy Iesu Grist ein Harglwydd.

Gan mai ef yw ein harchoffeiriad mawr, a'n rhyddhaodd o'n pechodau ac a'n gwnaeth yn offeiriadaeth frenhinol yn dy wasanaethu di, ein Duw a'n Tad.

Felly, gyda llu'r angylion a holl gwmpeini'r nef, cyhoeddwn ogoniant dy enw ac ymuno â hwy yn eu hemyn diderfyn o fawl:

Sanctaidd, sanctaidd, sanctaidd Arglwydd, Duw gallu a nerth, nef a daear sy'n llawn o'th ogoniant. Hosanna yn y goruchaf.

✠ Bendigedig yw'r hwn sy'n dyfod yn enw'r Arglwydd. Hosanna yn y goruchaf.

Cerddoriaeth

Missa brevis "Capella Regalis", Anthony Caesar (1924-2018)

Parhawn ar ein traed

Pob moliant a diolch i ti, y gwir a'r bywiol Dduw, Crëwr pob peth, Rhoddwr bywyd. Lluniaist ni ar dy ddelw dy hun, ond yr ydym ni wedi difwyno'r ddelw honno a syrthio'n brin o'th ogoniant. Rhoddwn ddiolch i ti am anfon dy Fab i rannu ein bywyd ni; fe'i hildiaist i farwolaeth fel y câi'r byd ei achub, a'i atgyfodi oddi wrth y meirw fel y bo i ni fyw ynddo ef, ac yntau ynom ninnau.

Sancteiddia â'th Ysbryd y bara hwn a'r gwin hwn, dy roddion inni, fel y bônt i ni yn gorff a gwaed ein Hiachawdwr, Iesu Grist.

Y nos y bradychwyd ef, cymerodd fara ac, wedi rhoi diolch, fe'i torrodd a'i roi i'w ddisgyblion, gan ddweud, Cymerwch, bwytwch; hwn yw fy nghorff a roddir drosoch: gwnewch hyn er cof amdanaf. ✠

Yr un modd ar ôl swper cymerodd y cwpan, ac, wedi rhoi diolch, fe'i rhoddodd iddynt, gan ddweud, Yfwch o hwn bawb, oherwydd hwn yw fy ngwaed o'r cyfamod newydd a dywelltir drosoch a thros lawer er maddeuant pechodau: gwnewch hyn bob tro yr yfwch ef er cof amdanaf. ✠

Gadewch inni gyhoeddi dirgeledd y ffydd:

Bu farw Crist.

Atgyfododd Crist.

Daw Crist mewn gogoniant.

Fel y gorchmynnodd ef inni, O Dad, yr ydym yn cofio Iesu Grist, dy Fab. Gan gyhoeddi ei farwolaeth fuddugoliaethus, a chan ymlawenhau yn ei atgyfodiad, a disgwyl iddo ddod mewn gogoniant, deunw â'r bara hwn a'r cwpan hwn i ti. Derbynn ein haberth o ddiolch a moliant.

Adfer ac adfywia dy holl bobl, adnewyddu ni a phawb y gweddiwn trostynt â'th ras a'th ✠ fendith nefol a derbyn ni yn y diwedd gyda'th holl saint i'r llawenydd diderfyn hwnnw a addawyd inni gan dy Fab, ein Harglwydd Iesu Grist.

Trwyddo ef, gydag ef, ynddo ef, yn undod yr Ysbryd Glân, eiddot ti, Dad hollalluog, yw pob anrhydedd a gogoniant, yn oes oesoedd.

✠ **Amen.**

Parhawn ar ein traed

Gweddî'r Arglwydd

Fel y dysgodd ein Hiachawdwr ni, gweddïwn yn hyderus:

Ein Tad, yr hwn wyt yn y nefoedd, sancteiddier dy enw, deled dy deyrnas, gwneler dy ewyllys; megis yn y nef, felly ar y ddaear hefyd. Dyro i ni heddiw ein bara beunyddiol a maddau i ni ein dyledion, fel y maddeuwn ninnau i'n dyledwyr. Ac nac arwain ni i brofedigaeth; eithr gwared ni rhag drwg. Canys eiddot ti yw'r deyrnas, a'r gallu, a'r gogoniant, yn oes oesoedd. Amen.

Tangnefedd

Bydd dy iachád yn ffynnu'n ein calonnau; dy gyfiawnder yn mynd o'n blaenau â'th gorff torredig yn gyflawn mewn tangnefedd.

Tangnefedd y Bythol Dduw a fo gyda chwi bob amser.

A'th gadw di yng nghariad Crist.

Rhannwn arwydd o Dangnefedd.

Rhannwn arwydd o Dangnefedd; yna penliniwn neu eisteddwn

Torri

Oen Duw, sy'n dwyn ymaith bechodau'r byd: trugarha wrthym.
Oen Duw, sy'n dwyn ymaith bechodau'r byd: trugarha wrthym.
Oen Duw, sy'n dwyn ymaith bechodau'r byd: dyro inni dangnefedd.

Cerddoriaeth

Missa brevis "Capella Regalis", Anthony Caesar (1924-2018)

Cymuno

✠ Iesu yw Oen Duw sy'n dwyn ymaith bechodau'r byd.
Gwyn eu byd y rhai a elwir i'w swper.

**Waredwr, nid wyf yn deilwng i'th dderbyn,
ond dywed y gair a chaf fy iacháu.**

Deuwn i Gymuno o'r Afrlladen Sagrafennol yn unig ar hyn o bryd

Motét

O Dduw, yn ôl dy gariad rhad, na chofia ein drygau mwy.
Maddau holl feiau'n bywyd, a rho ras i ni rodio'n ôl dy air;
i ochelyd drwg, ac i droi at rinwedd, fel y gallom iawn
gyfarwyddo'n traed i gadw dy ddeddfau ddyddiau'n hoes.

Geiriau

Lidley's Prayers (1566)

Cyfieithiad

Anadnabyddus

Cerddoriaeth

Richard Farrant (c.1525-1580)

Ar ôl i bawb Gymuno, safwn i ganu'r emyn

Emyn



**Rho im gly-wed beu-nydd
hyfryd eiriau 'Nuw,
hyn a geidw f'enaid
yn dragwyddol fyw.**

Geiriau

Tom Ellis Jones (1900-1975)

Cerddoriaeth | "Arthur"

David Evans (1874-1948)

Parhawn ar ein traed

Gweddi ôl-Gymun

Gweddiwn.

Duw ein Creawdwr, trwy dy rodd y gosodwyd pren y bywyd yng nghanol y baradwys ddaearol, a bara'r bywyd yng nghalon dy Eglwys; bydded i ni, sydd wedi ein porthi wrth fwrdd dy allor, gael ein trawsffurfio gan ogoniant y Groes ac adnabod hyfrydwch tragwyddoldeb; trwy'r un Iesu Grist ein Gwaredwr.

Amen.

Ymadael

Gras a thangnefedd a fo gyda chwi.

A'th gadw di yng nghariad Crist.

Yn nyddiau eich trallod, yn nyddiau eich llawenydd, ac ar ddydd y farn, arbeded Dduw chi; a bendith Duw hollalluog, y Tad, ✠ y Mab, a'r Ysbryd Glân, a fo yn eich plith ac a drigo gyda chwi yn wastad.

Amen.

Awn ymaith mewn tangnefedd.


Yn Enw Crist. Amen.

Parhawn ar ein traed hyd nes i'r gweinidogion ymadael; yna eisteddwn neu ymadael

Offrymddarn ar yr organ

Grand Chœur yn D fwyaf, César Franck (1822-1890)

Hysbys



Canon Tracy Jones

Caiff ein Canon dros Fywyd Cynulleidfaol ei chomisiynu'n Ddeon Bro ac Is-Gadeirydd y Synod ar gyfer Archddiaconiaeth Bangor yn y Gosber ar Gân heno am 3.30pm. Byddwn hefyd yn bendithio urddwisgoedd newydd y Gadeirlan yn y gwasanaeth. Estynnir croeso cynnes i bawb.

Siopa

Yn dilyn y sêl llwyddiannus o stoc Nadoligaidd y siop ym mis Rhagfyr, bydd sêl arall yn cael ei gynnal ar ôl gwasanaethau'r Sul o heddiw ymlaen, a bargeinion ar gael. Gobeithiwn ail-ddechrau gwerthu llyfrau dethol yn ystod y Grawys, a da fydd cynnull y rhai fu'n gwirfoddoli yn y siop maes o law.

Y Côr yng Nghadeirlan Caer

Canodd ein Côr yn fendigedig yn y Gosber ar Gân neithiwr yng Nghadeirlan Caer. Hyfryd oedd clywed gosodiad Cymraeg Dilys Elwyn-Edwards o Salm 23. Braf, hefyd, oedd gweld cymaint o wynebau cyfarwydd o deulu'r Cadeirlan yn y gynulleidfa. Ein diolch i bawb, gan gynnwys rhieni'r Côr, a helpodd â'r daith.

Cysegrïad

Mae llawer o ddiolch yn ddyledus i bawb sy'n ein helpu i baratoi ar gyfer y Cysegrïad Esgobol ddydd Sadwrn nesaf, pan fydd yr Archesgob yn

ordeinio dau esgob newydd yn y Gadeirlan. Mae'r gwasanaeth taleithiol hwn o reidrwydd yn wasanaeth wedi ei docynnu.

Croesawu Esgob Cynorthwyol Bangor newydd

Ddydd Mawrth 1 Mawrth, mae gwasanaeth esgobaethol yn cael ei gynnal yn y Gadeirlan i groesawu ein Hesgob Cynorthwyol newydd, Mary Stallard. Mae croeso i bawb yn y gwasanaeth hwn – ymunwch â ni i groesawu ein Hesgob newydd ynghyd â chyfeillion o bob cwr o'r esgobaeth.

Dydd Mercher Lludw

Mae'r Grawys yn cychwyn ar Ddydd Mercher Lludw, 2 Mawrth. Mae hwn yn ddiwrnod pwysig i bob un ohonom wrth i ni ddechrau tymor o edifeirwch, hunan-ymwadu, astudio ac elusengarwch. Dethlir dau Gymun yn y Gadeirlan ar Ddydd Mercher Lludw – ein Cymun dyddiol arferol am 12.30pm, a Chymun ar Gân gyda phregeth am 5.30pm. Bydd llwch yn cael ei arddodi yn y ddau wasanaeth. Ar ddyddiau Mercher dilynol yn y Grawys, byddwn yn cerdded ac yn gweddïo Gorsafoedd y Groes, gyda cherddoriaeth, am 7.30pm. Gwnewch ymdrech i fynychu defosiynau'r Grawys dros yr wythnosau nesaf.

Datganiadau Paned

Pob dydd Iau

11.15am am 45 munud

Paned a chacen o 10.45am

Canodd Sarah Jones yn hyfryd yn natganiad yr wythnos ddiwethaf. Mae rhaglen lawn ar gyfer y tymor cyfredol yn rhifyn newydd **Buchedd Bangor**.

24 Chwefror | Stephen Matthews | Tenor

Mae cyn Ysgolhaig Corawl Caergrawnt Stephen Matthews

yn cymryd egwyl o'i astudiaethau
operatig yn Mannheim yn yr Almaen
i berfformio datganiad o ganeuon
Ffrengig, Almaeneg a Saesneg.

3 Mawrth | Georgia Payne |
Trwmped

Clas

Gweler y rhaglen a'r manylion cysylltu
Zoom yn **Buchedd Bangor**.

21 Chwefror
Yr Is-Ddeon mewn sgwrs â Mary
Stallard, Esgob Cynorthwyol newydd
Bangor

7 Mawrth
Yr Is-Ddeon mewn sgwrs â Jordan
Hillebert am fywyd a gwaith y
diwinydd Henri de Lubac

Ein gweddi

Ein hesgobaeth Mary Stallard, wrth
iddi baratoi am ei Chysegriad

Yn glâf Mark Roberts; Gill Hobbs; Lis
Perkins; Blodwen Maria Jones; Ellis
Becket Cunningham

A fu farw'n ddiweddar Doreen
Jackson; Josie Williams; José Antonio

Gŵyl goffa Muriel Mary White (22)

Yr wythnos

Yn ddyddiol, Llun i Gwener

11am-3pm Cadeirlan ar agor i bawb

12.30pm Cymun Bendigaid | Holy
Eucharist

Dydd Llun
6.30pm Clas

Dydd Mawrth

5.30pm Gosber ar Gân | Choral
Evensong

Ymatebion | Responses, Sumsion Yn G
| in G, Sumsion
Ex ore innocentium, Ireland Dorch
Adams Fall, Homilius

Dydd Iau

11.15am Datganiad Paned

5.30pm Gosber ar Gân | Choral
Evensong

Ymatebion | Responses, Sumsion Yn A
| in A, Sumsion
Jesus Christ is Risne, Anon Sonata II,
Mendelssohn

Dydd Sadwrn

Nid oes Cymun Bendigaid am
12.30pm

2.30pm Ordeinio a Chysegro i Urdd
Esgob

Gwasanaeth wedi ei docynnu

27 Chwefror | Gŵyl Ddewi

8.15am Holy Eucharist

9.15am Cymun Bendigaid ar Gân

Yr Is-Ddeon yn pregethu
Folk Tune, Whitlock
Offeryn Glyn Rhosyn, Wynn Jones
O! tyrd ar frys, Iachawdwr mawr,
Wynn Jones
Grand Choeur, Montgomery


11am Choral Holy Eucharist

The Very Revd Prof. Gordon McPhate
preaching
Méditation, Vierende
Communion Service in G, Jackson
View me Lord, Lloyd
Festival Toccata, Fletcher

3.30pm Gosber ar Gân | Choral
Evensong

Ymatebion | Responses, Sumsion
Yn D | In D, Dyson
Hail Gladdening Light, Wood
Prelude and Fugue in D, Dubois

Cefnogaeth



Caiff y fangre sanctaidd hon llawn ffydd, gobaith a chariad, a phopeth sy'n digwydd yma, ei chynnal gan eich haelioni chi.

1 I roi rhodd ar-lein ar eich ffôn heddiw, sganwch y cod QR isod.

2 Defnyddiwch ein peiriant rhoi digyswllt yng nghefn Corff yr Eglwys i dapio'ch cerdyn neu'ch ffôn.

3 Rhowch rodd arian parod yn un o'r basgedi casglu rhoddion yng nghefn Corff yr Eglwys heddiw.

4 I sefydlu rhodd Debyd Uniongyrchol misol, gyda'r opsiwn i ychwanegu Cymorth Rhodd, chwiliwch ar-lein am "Eglwys yng Nghymru Rhoi yn Syth" a dewis "Bro Deiniol" o dan "Buddiolwr".

Trwy roi rhodd, byddwch yn ein helpu i barhau â'n gwaith hanfodol.

Cadeirlan ac Eglwys Archesgobol Deiniol Sant ym Mangor

Esgob ac Archesgob Cymru
Y Parchedicaif Andrew T. G. John

Is-Ddeon

Canon Siôn B. E. Rhys Evans

sionrhys.evans@eglwysyngnghymru.org.uk

Canon dros Fwyd Cynulleidfaoel

Canon Tracy Jones

tracyjones@eglwysyngnghymru.org.uk

Cyfarwyddwr Cerdd

Joe Cooper

joecooper@eglwysyngnghymru.org.uk

Organydd

Martin Brown

martinbrown@eglwysyngnghymru.org.uk

Gweinidog Teulu

Naomi Wood

naomiwood@eglwysyngnghymru.org.uk

Cwstos

Simon Taylor

simontaylor@eglwysyngnghymru.org.uk

Clerc y Cabidwl

Robert Jones

robertjones@eglwysyngnghymru.org.uk

Canon Emeritus

Canon Angela Williams

Aelodau o Goleg Offeiriadol y Gadeirlan

Y Parchg Ddr John Prysor-Jones, y Tra Pharchg

Athro Gordon McPhate, y Parchg Peter Kaye

Darlennydd

Elma Taylor

Rhif elusen 1158340

Cynaliadwyedd a chaniatâd

Rydym yn defnyddio papur sydd wedi ei ailgylchu 100% a'i gynhyrchu â charbon deuocsid isel.

Caiff rhai o'n gwasanaethau'n eu ffrydio ar Facebook o gamera ym mhen dwyreiniol Corff yr Eglwys sy'n wynebu'r dwyrain, ac mae'r recordiad ar gael wedi hynny ar dudalen Facebook y Gadeirlan. Efallai y bydd ffotograffydd swyddogol ar ddyletswydd. Mae eich presenoldeb yn gyfystyr â'ch caniatâd i gael eich cynnwys mewn unrhyw ffilmio, tynnu lluniau, recordio sain neu ddarlledu. Os nad ydych am i ffotograff ohonoch chi neu blentyn yn eich gofal gael ei ddefnyddio gan y Gadeirlan, siaradwch ag aelod o dîm y Gadeirlan.

Cydnabyddiaethau

Atgynhyrchir deunydd yn y drefn hon o wasanaeth o dan CLL 280874. Mae'r gwasanaeth hwn yn cynnwys rhannau o'r **Drefn ar gyfer y Cymun Bendigaid 2004** hawlfraint © Gwasg yr Eglwys yng Nghymru 2004 Mae'r llithoedd a'r salmyddiaeth Gymraeg yn seiliedig ar **The New Revised Standard Version of the Bible** ac **Y Beibl Cymraeg Newydd: Argraffiad Diwygiedig**. Daw cytgan y salmyddiaeth Gymraeg o Nicander, **Y Psallwyr** (1850) a'r salmyddiaeth Saesneg o **The Saint Helena Breviary** (2019).

Ar y clawr ceir llun o fwrdd yr allor yn Eglwys Beuno Sant, Pistyll, yn Ardal Weinidogaeth Bro Madryn, o gasgliadau Comisiwn Brenhinol Henebion Cymru.

